

**Timigissarnerup nerisaqartarnerullu sunniiveqatigiinnerisigut timikkut  
eqqarsartaatsikkulu inuunermi atukkat qanoq pitsaanerulersissinnaaneri immikkut  
sammillugit kalaallisut aallakaatitassiornissamut aningaasanik immikkoortitsinissamut  
Naalakkersuisut peqquneqarnissaannik Inatsisartut aalajangiiffigisassaattut  
siunnersuut**

*(Saqqummiisoq: Inatsisartunut ilaasortaq Andreas Uldum, Demokraatit)*

**pillugu**

**Ilaqutariinnermut Peqqissutsimullu Ataatsimiititaliap**

**ISUMALIUTISSIISSUTAA**

**Siunnersuutip aappassaaneerneqarnerani saqqummiunneqartoq**

Ataatsimiititaliap suliaqarnermini kingullermik ukuninnga inuttaqarpoq:

Inatsisartunut ilaasortaq Olga P. Berthelsen, Inuit Ataqtigiit, siulittaasoq  
Inatsisartunut ilaasortaq Debora Kleist, Inuit Ataqtigiit, siulittaasup tullia  
Inatsisartunut ilaasortaq Isak Hammond, Inuit Ataqtigiit  
Inatsisartunut ilaasortaq Jørgen-Ole Nyboe Nielsen, sinniisussaq, Demokraatit  
Inatsisartunut ilaasortaq Knud Kristiansen, Atassut  
Inatsisartunut ilaasortaq Ruth Heilmann, Siumut  
Inatsisartunut ilaasortaq Malik Berthelsen, Siumut

UKA 2011-mi ulloq 5. oktober 2011 siullermeerinerup kingorna siunnersuut UKA 2011-mi Inatsisartunut taamani ilaasortaasumit Niels Thomsen-imit Demokratineersumit saqqummiunneqartoq ataatsimiititaliap misissorpaa. Niels Thomsen-ip Inatsisartunit tunuarnerata kingorna Inatsisartunut ilaasortamit Andreas Uldum-imit siunnersuut ingerlanneqarpoq.

**Siunnersuutip imarisaa siunertaalu**

Siunnersuuteqartup kissaatigaa nerisaqarnerup, timersornerup, tarnikkut timikkullu peqqissuunerup ataqtigiinnerannut sammisumik kalaallisut oqaasertalimmik nangeqattaartumik aallakaatitassiornissamut aningaasanik immikkoortitsinissaq Inatsisartut

akuersissutigissagaat. Tassuunakkut inuiaqatigiit inuunerisa naleqassusaat ataatsimut nukittorsarniarlugu – timikkut tarnikkullu.

### **Siunnersuutip Inatsisartuni siullermeerneqarnera**

Aalajangiiffigissassatut siunnersuutip siullermeerneqarnerani akissuteqaamminni siunnersuummut allannguutissatut siunnersuummik imaattumik Naalackersuisut saqqummiussipput:

#### **Naalackersuisut peqquneqassapput:**

- 1. Kalaallisut aallakaatitassiat quliusut aallakaateqqinneqarsinnaanerat pillugu KNR saaffigineqassasoq.**
- 2. Nerisat timigissarnerlu pillugit annertunerusumik paasisutissiinissamut aningaasassarsiortoqassasoq.**
- 3. Suliaq pillugu UPA 2012-imi nassuiaasoqassasoq.**

Partiit oqaaseqaataat siullermeerinninnermilu oqallinneq innersuussutigalugit makku taaneqassapput:

**Inuit Ataqaatigiit** siullermeerinermi Naalackersuisut allannguutissatut siunnersuutaat tapersersorpaat.

**Siumut** siullermeerinermi siunnersuummut taama iluseqartillugu tapersiivoq.

**Demokraatit** siullermeerinermi siunnersuummut taama iluseqartillugu tapersiivoq.

**Atassut** siunnersuummut taama iluseqartillugu tapersiivoq aamma Naalackersuisut siunnersuutaanni immikkoortut ilaannut tapersersiivoq.

**Kattusseqatigiit Partiata** siullermeerinermi Naalackersuisut allannguutissatut siunnersuutaat tapersersorpaat.

Tamanna tunngavigalugu siunnersuut Ilaqutariinnermut Peqqissutsimullu ataatsimiititaliamut suliareqqitassanngorlugu innersuussutigineqarpoq.

### **Ataatsimiititaliap siunnersuummik suliarinninnera**

Innuttaasut peqqissuunissaannik suliniutip – Inuunerittap – 2011-mi aningaasanut inatsimmi kontop pingaarnarup 34.15.01-ip, *Paarisap aamma Inuunerittap*, ataani taaneqartoq naapertorlugu meeqqanik inuusuttunillu kiisalu taakku ilaqutaannik utoqqarnillu sullissisussaananeranut sanilliullugu sullitassat siunnersuuteqartup siunnersuutaani taaneqartut allaanerusinnaallutillu siamasinnerusinnaasut ataatsimiititaliap maluginiarppaa.

Siunnersuuteqartup siunnersuutaa innuttaasunut kalaallisut paasisinnaasunut tamanut sammitinneqarpoq, ukiut inuttullu qanoq inissisimaneq apeqqutaatinnagit.

Innuttaasut inuunerisa naleqassusiat nukittorsarniarlugu pinaveersaartitsinermik suliniuteqarnissaq pisariaqartinneqartoq Ilaqutariinnermut Peqqissutsimullu ataatsimiititaliami isumaqatigiissutigineqarpoq. Pinaveersaartitsinermik suliniuteqarnermut paasisat kingulliit, taakkulu nutarterneqarlutillu suliniarfigineqartunut naleqqussarneqarnissaat ilaatinneqassasut ataatsimiititaliami tunngaviusumik isumaqatigineqarpoq.

Pinaveersaartitsinermik suliniutit innuttaasut inuunerisa naleqassusaannut iluaqutaasinnaasut siullermeerinermi partiit tamarmik annertuumik pingaartikkaat ataatsimiititaliap maluginiarppaa.

Siullermeerilluni oqallinnermi siunnersuuteqartup siunnersuutaata aningaasalersorneqarnissaa annertuumik sammineqartoq Ilaqutariinnermut Peqqissutsimullu Ataatsimiititaliap maluginiarppaa.

Aammattaaq Ilaqutariinnermut Peqqissutsimullu Ataatsimiititaliap maluginiarppaa Peqqissutsimut Naalakkersuisoq isumaqartoq kontomit pingaarnermit 34.15.01-mit, *Paarisa aamma Inuuneritta*, aningaasaliissutinit tamakkiisumik ilaannakuusumilluunniit siunnersuut aningaasalersorneqarsinnaanngitsoq. Tassunga kontomut pingaarnermut ukiumut 2011-mut 10.712.000 kr.-nit immikkoortinneqarsimapput. 2012-imut Aningaasanut inatsimmi kontomi pingaarnermi 34.15.01-imi, *Paarisa aamma Inuuneritta*, aningaasaliissutit 6.676.000 kr.-inut ikililerneqarput. Ikililiinermi pissutaatinneqarpoq, 2012-imut Aningaasanut inatsimmi konto pingaarnermit, *Paarisa aamma Inuuneritta*, konto pingaarnermut 34.12.02-mut, *Ineriartorneq Suliassallu*, 4 mio. kr.-nit nuunneqarmata. Taassuma saniatigut konto pingaarneq 34.15.01, *Paarisa aamma Inuuneritta*, 2012-imut suli 32.000 kr.-nik ikililiiffigineqarpoq.

Siunnersuummut aningaasalersuutissat ilaannakuusut siunnersuuteqartup innersuussutigisimmamagit ataatsimiititaliap paasivaa.

Siunnersuummut aningaasalersuutissat sinnerisa avataaniit pissarsiarineqarsinnaanissaat nalorninarqartoq ataatsimiititaliap paasivaa.

Kontomi pingaarnermi 34.15.01-imi aningaasaliissutinit immikkut atugassanngortitsinikkut siunnersuummut aningaasalersuutissat ilaasa pissarsiarineqarnissaat ataatsimiititaliap isumaqatigiinngissutigaa. Aammattaaq pinaveersaartitsinermik suliniutit sorliit siunnersuummi pineqartumi pinaveersaartitsinermik suliniutinit taarserneqassagaluarnerisut ataatsimiititaliap isumaqatigiinngissutigaa.

Ataatsimiititaliap siunnersuummik suliaqarnerminut atillugu apeqqutinik ersarissaataasunik arlalinnik Naalakkersuisunut apeqquteqaateqarsimavoq. Ataatsimiititaliap malitseqartitsilluni apeqqutaanut akissut 18. april 2012-imi ullulerneqartoq tapiliussatut 1-tut ilanngunneqarpoq, kiisalu akissut 1. maj 2012-imi ullulerneqartoq tapiliussatut 2-tut ilanngunneqarpoq. Ataatsimiititaliap akissut isumaliutissiisummi annertunerusumik sammissavaa, taamaattorli

ataatsimut isigalugu tapiliussat apeqqutinik akissutinillu imallit taaneqartut innersuussutigissallugit.

### **Pinaveersaartitsinissamik pisariaqartitsineq pillugu**

Pinaveersaartitsinermi suliniutinut pisortanit aningaasaliissutinik naammattunik immikkoortitsisoqarsimasoq qaqugukkut oqaatigineqarsinnaanersoq Ilaqutariinnermut Peqqissutsimullu Ataatsimiititaliap oqaluuserisimavaa. Tassunga atatillugu pinaveersaartitsinermi suliniutit pisariaqassusiat ataatsimiititaliap oqaluuserisimavaa. Pisariaqartinneqartut naapertorlugit pinaveersaartitsinermut aningaasaliissutit immikkoortinneqassasut ataatsimiititaliaq oqallinnerit tunngavigalugit inernilivoq. Pinaveersaartitsinerup pisariaqartinneqarnera annertuppat aningaasat amerlanerit immikkoortinneqassapput. Pisariaqartinneqartut piviusut ersersinniarlugit qulaajaanissaq Ilaqutariinnermut Peqqissutsimullu Ataatsimiititaliamut pingaartuuvoq, taamaalilluni inuiaqatigiit aningaasaqarneranni tamarmiusumi pingaarnersiukkanut taanna ilanngunniassamat.

### **Inuit peqqissusaat pillugu suleriesissat siunniussallu.**

Naalakkersuisunut siulittaasuusimasup Hans Enoksenip kiisalu Peqqissutsimut Avatangiisinullu Naalakkersuisuusimasup Agathe Fontainip Inuunerittamik suliniummi 2007-2012 aallaqqaasiutiut oqaaseqarnerminni aallaqqaasiutitut immaattumik saqqummiussaqrput:

*“Naalakkersuisut innuttaasut peqqissusaata pitsaanerulersinneqarnissaa, tamannalu aqputigalugu inuunerup naleqassusiata qaffatsinneqarnissaata eqqanaarneqarnissaa siunertaraat. Tamanna nakorsarneqarnikkut taamaallaat ingerlanneqarsinnaanngilaq. Piffissanngorpoq peqqissutsimik siuarsaaneq pinaveersaartitsinerlu annertunerusumik sammineqalernissaat tulleriiaarinermilu salliutinneqarnissaat.*

*Nunarsuarmi tamarmi inooriaatsip nassatarisaaniknappaateqalersut sukkasoorujussuarmik amerliartorput. Sukkorneq aamma uummatit taqaatigut napaatit puallarpallaarnerup nassatarisai aammalu pujortartarnerup nassatarisaanik kræftimik nappaatit nunarsuarmi tamarmi ajornartorsiutaapput peqqinnissaqarfiullu iluani qaartartutut qaariaannartut illutik. Nunarsuaq tamakkerlugu eqqarsaatigigaanni pualavallaarneq kaannersuarnut naleqqiullugu ajornartorsiutaanerusutut WHO’p nalilerpaa. Maani nunatsinni peqqinnangitsumik inooriaaseqarnerup nassatarisaasa takusarneri aatsaat aallartilaarput, ukiunili tulliuutuni peqqinnissaqarfimmut sunniutissai annertusiartussasut nalunngilarput. Ineriartorneq taamaattoq sunniuteqarluartumik angusassamillu toraagalimmik iliuseqarnitsigut inuiaqatigiit peqqissusaat pitsanngortinnianngikkutsigu aningaasatigut inuttullu annertuumik naleqassaaq”.*

Inuunerittap piffissami 2007-2012-imi atuunnera Ilaqutariinnermut Peqqissutsimullu Ataatsimiititaliamit eqqumaffigineqarpoq.

2007-2012-imi Inuunerittamut aallaqqaasiutitut oqaatigineqartut innersuussutigalugit pinaveersaartitsinermut aningaasaliissutit siunissami qaffanneqartariaqalersinnaasut Ilaqutariinnermut Peqqissutsimullu Ataatsimiititaliaq isumaqarpoq.

Inuit peqqissusaat pillugu maanna suliniutip nanginneratut inuit peqqissusaat pillugu suliniummik nutaamik, Inuuneritta 2013-2018-mik, akuersissuteqartoqarnissaa Ilaqutariinnermut Peqqissutsimullu Ataatsimiititaliap tapersorsorjaa.

### **Pinaveersaartitsinermi suliniutinut aningaasaliisarneq pillugu**

Pinaveersaartitsinermit suliniutinut iliuutsillu aningaasalersorneqarnerannut tunngatillugu ataatsimiititaliap oqallisigisimavaa imigassanut, tupamut, lottornermut aningaasanoorutinullu akitsuutitigut nunatta karsiata isertitai pinaveersaartitsinermit suliniutinut iliuutsinullu toqqaannartumik attuumassuteqassanersut.

Ukiumut 2010-mut nunatta karsiata naatsorsuutaaneersut uku Ilaqutariinnermut Peqqissutsimullu Ataatsimiititaliap erseqqissaatigissavai:

|  |                               |
|--|-------------------------------|
| Imigassanut akitsuutinit isertitat:                  | 235.428.000 kr.               |
| Tupamut akitsuutinit isertitat:                      | 195.749.000 kr.               |
| Lottornermut akitsuutinit isertitat:                 | 8.344.000 kr.                 |
| Aningaasanoorutinut akitsuutinit isertitat:          | 11.257.000 kr.                |
| Nunatta karsiata ukioq 2011-mi isertitai katillugit: | <b><u>450.778.000 kr.</u></b> |

2011-mut Aningaasanut inatsimmi kontomi pingaarnermi 34.11.05-imi, *Imigassamik ajornartorsiuteqartunut katsorsaasarfinnut tunngasumi*, 4.982.000 kr immikkoortinneqarsimapput. Allatut oqaatigalugu aningaasanut inatsimmi 5 mio. kr. taamaallaat imigassamik atorneerluinnermut kiisalu atorneerluinnermut allanut aningaasanoorajunneq ilanngullugu katsorsaarnernut atugassatut toqqaannartumik immikkoortinneqarsimapput, akerlianik 2010-mi imigassamik atorneerup kingunerisaanik inuiaqatigiit 235 mio. kr.-it sinnerlugit isertitaqarsimasut. 2012-imut Aningaasanut inatsimmi kontomut pingaarnermut 34.11.05, *Imigassamik ajornartorsiuteqartunut katsorsaasarfiit*, aningaasat 5.092.000 kr immikkoortinneqarsimapput. Kisitsisit taakkua imminnut sanilliunneqarnerat assut eqqarsarnartoqartoq Ilaqutariinnermut Peqqissutsimullu Ataatsimiititaliaq isumaqarpoq. Aamma kommunini namminersorlunilu inuussutissarsiornermi imigassamik atorneerluinnermik pinaveersaartitsinermit katsorsaarnermullu aningaasanik atuisoqartarpoq, kisiannili immikkoortumi pinaveersaartitsinermit suliniutinut atorneerluinnermullu katsorsaarnermut aningaasaliissutit kiisalu inuiaqatigiit imigassamik atorneerluinnermik isertitaasa assigiinngilluinnerat tamatuma allanngortissinnaanngilaa.

2012-imut Aningaasanut inatsimmi kontomi pingaarnermi 30.15.01-imi, *Paarisamut aamma Inuunerittamut tunngasumi*, pujortartarneq pillugu pinaveersaartitsinissamut 500.000 kr.-nit immikkoortinneqarput, illuatungaani 2010-mi tupamut akitsuutit kingunerisaannik 195 mio. kr.-it isertinneqarsimallutik. Nioqqutissamut pinaveersaartitsinermi sammeneqartumut

anigaasat isertinneqartut anigaasartuutillu assigiinngissutaat aamma tassani annertuvoq.

Imigassamut, tupamut, lottornermut anigaasanoorutinullu akitsuutinit isertitat amerlanerit katsorsaanernut taaneqartunut immikkoortinneqartariaqarnersut ataatsimiititaliap oqaluuserisimavaa.

Aningaasanik pinaveersaartitsinermik suliniutinut atugassanngorlugit immikkoortitsisarnissamik ataatsimiititaliap manna tikillugu oqaluuserisaata isumaliutigisaatalu partiinit naalakkersuisunillu siunnersuutip taassuma aappassaaneerneqarnerani politikikkut oqaaseqarfigineqareernissaa ataatsimiititaliamit kissaatiginartinneqarpoq.

Imigassamik atonerluinerup, anigaasanoorajunnerup tupamillu atuinerup annertuumik qaffasinnerata kingunerisaanik assersuutigalugu peqqinnissaqarfiup inunnillu isumaginninnerup iluani inuiaqatigiinnut toqqaannartumik anigaasartuutit Ilaqutariinnermut Peqqissutsimullu Ataatsimiititaliap naatsorsuusiaanut aamma sanilliussissutigineqassapput.

### **Naalakkersuisut allannguutissatut siunnersuutaat pillugu**

Naalakkersuisut akissuteqaamminni allannguutissatut siunnersuummik saqqummiipput isumaliutissiisummi matumani aallaqqaasiutitut ilanngunneqartumik. Allannguutissatut siunnersuut pingasunik immikkoortortalik ataatsimiititaliap sukumiinerusumik nalilersosimavaa. Ataatsimiititaliaq allannguutissatut siunnersuummut tunngatillugu siullermeerinerup kingorna malitseqartitsilluni Naalakkersuisunut arlalinnik apeqquteqarsimavoq.

Allannguutissatut siunnersuummi immikkoortutut siullertut KNR aallakaatitassiat tigussaasut qulit aallakaateqqinneqarsinnaanerannut periarfissaq pillugu saaffigineqassaaq.

Ilaqutariinnermut Peqqissutsimullu Ataatsimiititaliap nuannaarutigalugu maluginiarpa KNR-ip aallakaatitassiat qulit ukioq manna 2012-imi aallakaateqqissimagai imaluunniit aallakaateqqikkai.

Allannguutissatut siunnersuutip immikkoortuatut 2-tut nerisaqarneq timersornerlu pillugit paasititsiniaasoqaqqinnissaanut anigaasanik pissarsiniarluni suliniuteqartoqassaaq.

Siunnersuuteqartup siunnersuutigisaatut aallakaatitassiap qanoq isikkoqarsinnaanera pillugu oqallissaarummik saqqummiussisoqarnissaa siunertaralugu Inuussutissat pillugit Siunnersuisoqatigiit saaffigineqarsimanerat Ilaqutariinnermut Peqqissutsimullu Ataatsimiititaliap paasisinnaavaa.

Aningaasalersuinissamut tunngatillugu oqaatigineqassaaq, Peqqissutsimut Naalakkersuisup siunnersuutaatut Inuussutissat pillugit Siunnersuisoqatigiit nangeqattaartumik aallakaatitassiornissaaq pillugu isummeqqusissummik suli suliaqarsimangitsut, tamatumalu kingorna nangeqattaartumik aallakaatitassiap taamaattup qanoq akeqarnissaa pillugu aningaasatigut naatsorsuusiortoqarsimangitsoq. Peqqissutsimut Naalakkersuisumit ataatsimiititaliamut ilisimatitsissutigineqarpoq avataanit aningaasalersuinissamut aningaasanik suli pissarsisoqarsimangitsoq.

Aammalu allannguutissatut siunnersuutip immikkoortuisa pingajuattut immikkoortut siulliit marluk pillugit suliaqarnermut atatillugu Naalakkersuisut UPA 2012-imi nassuiaateqartussaani kuupput.

Ilaqtariinnermut Peqqissutsimullu Ataatsimiititaliap maluginiarpaa akissutini nassiunneqartuni immikkortut 1 aamma 2 pillugit Naalakkersuisut suliniuteqartut.

Ataatsimiititaliap maluginiarpaa Naalakkersuisut namminneq allannguutissatut siunnersuutertik naammassisimangikkaat.

### **Siunnersuutip aningaasatigut kingunerisassai**

Siunnersuuteqartup siunnersuummi oqaatigaa siunnersuutip akuersissutigineqarnera aningaasaqarnikkut kinguneqarumaartoq. Aningaasatigut kinguneriumaagaatut siullertut naatsorsuutigineqarsinnaasut tassaassapput aallakaatitassiornermut aningaasartuutit 2 mio. kr.-it tungaanut annertussusillit. Aningaasat ilaat kontomit pingaarnermit 34.15.01-imit, *Paarisamut aamma Inuunerittamut* tunngasumit, aningaasalersorneqarsinnaasut ilaallu aningaasaateqarfinit, tunissutinit assigisaannillu akilerneqarsinnaasut siunnersuuteqartoq isumaqarpoq.

Siunnersuutip piviusunnigortinneqassaguni ungasissumut isigisumik inuiaqatigiinnullu nalimmassaanikkut iluaqutaanissaa siunnersuuteqartup naatsorsuutigaa. Timikkut anersaakkullu inuttut naleqassuseq annerusoq anguneqarpat, tamanna peqqinnissaqarfiup aningaasartuutaasa minnerulernerannik kinguneqassaaq.

Naalakkersuisut allannguutissatut siunnersuutaat akuerineqassagaluaruni aningaasaqarnikkut killilerujussuarmik kinguneqarumaarpoq.

Tusagassiutit aqutigalugit paasititsiniaanermut sunalu siunertaralugu ukiuni 2010-mi aamma 2011-mi katillugit aningaasat suut atorineqarsimanersut ataatsimiititaliap Naalakkersuisunut apeqqutigisimavaa.

Ataatsimiititaliap paasisinnaavaa Naalakkersuisut suli tamanna pillugu tamakkiisumik nassuiaateqarsimangitsut. 2010-mi aamma 2011-mi tusagassiutitigut paasititsiniaaneq

pillugu Peqqissutsimut Naalakkersuisumit nassuiaasoqarpoq, kisiannili 2010-mi aamma 2011-mi tusagassiuutitigut paasititsiniaalluni Naalakkersuisuni tamani suliaqarnermut tunngatinnagu.

Kukkusoqaratarsinnaagaluartoq Peqqissutsimut Naalakkersuisumit ilisimatitsisoqarpoq 2010-mi suliaasaqarfimmi tusagassiuutitigut paasititsiniaanermut kr. 713.062-it kiisalu 2011-mi kr. 1.634.397-it atorneqarsimasut.

Ataatsimiititaliap pingajussaaneerluni apeqqutimi tamatuma akineqarnissaa misilippaa, Naalakkersuisunullu tamarmiusunut uku apeqqutigalugit:

Ukiuni 2010-mi aamma 2011-mi tusagassiuutitigut paasititsiniaanermut aningaasat katillugit qassit Naalakkersuisut atorpaat, kiisalu siunertanut sunut? Apeqqutip tamatuma eqqortuunera paasiniallugu, taava ataatsimiititaliap paaserusuppaa, ukiuni taaneqartuni Naalakkersuisut tamarmiusut tusagassiuutitigut paasititsiniaanermut atorsimasaanni, pinaveersaartitsineq pillugu tusagassiuutitigut paasititsiniaanernit tamarmiusunit 2010-mi aamma 2011-mi aningaasat kr.-ninngorlugit procentit qassiusimanersut?

Apeqqummut tunuliaqutaavoq, Namminersorlutik Oqartussanit (peqqissuseq pillugu) pitsaaliuinermit paasissutissiinermit tunngasunut tusagassiuutitigut paasititsiniaanermut aningaasat qassit atorneqarsimanersut ataatsimiititaliap tigussaasumik paaserusummagu.

Ataatsimiititaliap neriutigaa apeqqut piaartumik akineqassasoq. Pitsaanerpaassaaq Naalakkersuisunit akissut siunnersuutip aappassaaneerpeqarnerani saqqummiunneqarsinnaappat.

### **Ataatsimiititaliap inassuteqaatai**

**Ataatsimiititaliami amerlanerussutillit Siumumeersut, Demokraatineersut aamma Atassummeersut siunnersuut pillugu ima oqaaseqarput:**

Timigissarnerup nerisaqartarnerullu imminnut ataqtigiittuunerat pillugu taamalu timikkut tarnikkullu peqqissuunissamik anguniagaqarnermut naapertuulluurtutut isigineqarmat siunnersuut Siumup, Demokraatit Atassutillu tamakkiisumik tapersorsorpaat. Ullutsinnut naapertuussakkanik aallakaatitassiornemik nutaaliorneq pisariaqartuuvoq, nutaannngitsut aallakaateriikkallu inuusuttunik meeqqanillu tiguaanissamut ajornakusoornerusarmata. Taamaattumik aallakkaatitassanik nutaaliortuarnissaq pisariaqartuurtuuvoq.

Aningaasat nunatta karsianut akitsuutineersut annertussusaat qiviaraanni taakkunuunatigut pinaveersaartitsinermit annertunerusumik atuisoqarpat siunissami innuttaasut peqqinnerulernissaannik kinguneqartussaavoq, taamaalillunilu aamma angusassat pitsaasut anguneqarnerussallutik, tamanna Siumumit, Demoraatinit Atassumiillu qularutiginnngilarput imminullu akilerumaartutut isumaqarfialugit. Ataatsimiititaliap ilanngullugu



kaammattuutigaa, siunertamut tapersorsornartumut avataanit aningaasassarsiornissaq Naalakkersuisut sulisutitigissagaat.

**Ataatsimiititaliami amerlanerussuteqartut siuliani taaneqartut tunuliaqutaralugit siunnersuut ilusimisut isikkoqartillugu Inatsisartunit akuerineqassasoq inassutigaaat.**

Ataatsimiititaliami amerlanerussuteqartut Naalakkersuisunit allannguutissatut siunnersuutip itigartinneqarnissaa inassutigaaat.

**Ataatsimiititaliami ikinnerussuteqartut Inuit Ataqtigiinneersut ima oqaaseqassapput:**

Ikinnerussuteqartut siunnersuutip siunertaa akuersaarpaat, tamatumalu kingorna nerisaqarnerup timersornerup aamma timikkut tarnikkullu atugarissarnerup ataqtigiinnerat isiginiarlugu pitsaaliuilluni suliniutinik ingerlatsisoqassalluni.

Ikinnerussuteqartut isumaqarput pisariaqartitsineq Naalakkersuisut suliniutaanni naapertorneqartoq kiisalu Naalakkersuisunit maanna allannguutissatut siunnersuutip malitseqartinnissaa tulluurtut nalilerneqarluni.

Inuit Ataqtigiit kaammattuutigaaat, inuit peqqissusaat pillugu suliniutaajumaartussami innuttaasut akornanni timikkut tarnikkullu atugarissaarnerup nukittorsarneqarnissaa suliniutigineqassasoq.

**Ataatsimiititaliami ikinnerussutillit inassutigaaat aallaqqaammut siunnersuutip tamanna tunuliaqutaralugu Inatsisartunit itigartitsissutigineqarnissaa.**

Tamanna tunuliaqutaralugu Inuit Ataqtigiit Naalakkersuisunit allannguutissatut siunnersuut tapersorsorpaat, akuerineqarnissalu inassutigalugu.

Ataatsimiititaliap taamatut oqaaseqaateqarluni isumaliutissiissummilu allassimasutut paasinnilluni siunnersuut aappasaaniigassanngortippaa.

---

Olga P. Berthelsen  
Siulittaasoq

---

Debora Kleist

---

Isak Hammond

---

Jørgen-Ole Nyboe Nielsen

---

Knud Kristiansen

---

Ruth Heilmann

---

Malik Berthelsen/v  
Kristian Jeremiassen